



芝蘭別集

公移卷之二

定刊賦役總會文冊案

一為定賦役以一政令以便遵守事照得本院撫臨
以來檢看得四川一省各項錢糧止有糧儲驛傳事
宜二部俱係總數大綱其起徵規則與審編銀力二
差及一應公費等項通未查載以致上無所據下無
所知致使貪猾得遂漁獵之奸而小民不勝誅求之
苦及查得湖廣河南等省錢糧徭役俱已會議定規
刊為書冊立法周詳可以遵守相應委官查照會議
編造為此除將湖廣河南二省賦役總會文冊二部



發來外案仰布政司即行右布政使李清會同按察司副使沈應龍各不妨原務查照發來湖廣河南二省規則將一應大小賦役公私費用責令布政司各科承行該吏備查始末卷簿叅稽因革事宜務適輕重之均立為一定之則先將凡例總目并立法總議逐項編出仍作急通行守巡兵備驛傳屯鹽等道各將所理職掌所屬府州縣衛所巡司驛遞等衙門各將原額官民糧米歲收歲支起存邊腹的數各若干均徭銀力二差應該若干里甲支應并走遞夫馬各若干戶口食鹽商稅課程若干驛遞馬匹船隻夫役

協濟銀兩防夫各若干雜役大戶民壯工食州縣軍解各若干一應部運及應朝官負公差人役盤纏曆日紙劄造冊工食各若干新官到任家火孤老月糧布花舉貢盤纏修理衙門城池故官長夫衛所局料公費并未盡錢糧差役通行查出仍要見某州縣山多田少錢糧偏重原坐邊倉糧米若干應否通融某州縣地方廣闊錢糧稍輕原坐邊倉糧米若干應否加增及差徭等則應否酌量均平驛遞夫馬應否酌量改派何者民情稱便應合照舊何者土俗不宜應該更張一一備細開申該司及委官處各斟酌停當

先編草冊一部送院查議發去刊布永為遵守使小民皆知賦有常數役有定則吏書經收人等不得以投隙而售奸此寔為政愛民之切務湏不憚煩勞期成美事其合用紙劄工食應動銀兩數目仍具呈通詳施行

查處驛傳事宜案

一為查處驛傳以濟困弊事據驛傳道呈奉本院案驗前事備仰本道官吏即便查照後開條款一一會同布按二司從長查議明白作速呈詳定奪施行中間若有窒礙難行者亦要明白回報此寔愛民之切務慎勿遲延未便仍先行各該委官暫且信備待候定之日通行查照施行等因奉此該本道僉事趙廷松會同布政司左布政使嚴時泰按察司按察使紀常布政司分守川西道左叅政李義壯按察司清軍道副使沈應龍議查得各府州縣驛遞有路當衝要而原編夫馬數少者有設在偏僻而舊額船馬多編者有糧止千百而盡編驛遞升合無遺者有糧至五六萬而止編二三萬餘無下落者有額糧數少而編僉糧數友多者有州縣有限而本處驛遞偏多難以遠編者衝僻繁簡遠近自是不均蓋自國初開設

以來或增或減稍因其舊至於編定吏胥作弊遂至
懸絕如重慶府額糧三十四萬止顯二十一萬潼川
州額糧二萬六千止顯一萬七千如廣安州所屬四
縣嘉定州所屬六縣地土本同而驛傳所編州縣
重其他州縣比比不同除就近編僉照舊難動外合
將萬縣夔州等遞運所仍照該府原議減船增馬通
融議處龍泉陽安南津珠江安仁等驛俱改就本處
簡州資陽資縣內江及蓬溪射洪一縣近更衝繁原
編皇華等驛馬匹夫糧俱退回協濟該縣里甲以免
偏累及各驛遞衝僻增減先儘本處丁糧查議編補
備造草冊開列前件交互聲說通候呈詳裁定會
各該委官遵照編僉覈實刊給施行等因呈詳到院
據此案照先該本院節據各州縣申呈川中差徭間
有偏累而驛傳一事尤為病民其最甚者先年審編
不以本州縣錢糧坐派所轄驛遞而俱於隔遠編僉
後來承訛襲舛莫為釐正使百姓棄畊作而就役負
薪米以遠行光棍因之勒攬官吏用是刁難奸猾者
恃頑而避役善弱者偏累而逃亡日久受斃莫可支
持其他如船隻之濫設馬驢之多寡鋪陳之科派州
縣夫馬之協濟館夫親役之受害船夫糧石之不一

皆宜區處以蘇民困已經案行該道會同布按二司查議去後今據前因隨行布政司查照節年黃冊將各州縣欺隱抄劄沒官水衝拔籍等項糧石盡數開報前來查對糧儲驛傳事宜與夫合屬錢糧格取文冊逐一酌量繁簡註定數目通融均編求為畫一除將查定過由票一張案行驛傳道并成重等府嘉眉等州各查照後開條款并編僉數目抄行各該委官作急審編給發各該驛遞着役定限兩箇月以裏將編過文冊繳報查考仍行布按二司并守巡兵備各道遵行外為此合行刊刻書冊仰一體查照施行

計開

編僉規則總議

一便審編查得各府州縣驛遞之遠近不同而編差之隔別不一間有本處錢糧而編撥於五六百里之外者有甚至千里之外者有一縣而幫貼二三驛者彼此隔遠奔走不便因被各處積年光棍百計詐害愚弄羅織只得雇募加倍幫貼未及旬日就假以倒死馬匹等項為名來索加添銀兩稍有不從或告上司批追或該驛具呈所管州縣除正數出過一番又添一番情甚

不堪今通行查議俱先儘本州縣錢糧編派本處驛站如有多餘錢糧撥幫隣近驛站如本處錢糧不敷取補於隣近州縣如本處原無驛通者或與照舊或改從附近庶幾事體穩當人情稱便

一均糧數四川一省之錢糧以供一省之驛傳勞佚自當相均多寡不宜互異今查得各所屬州縣有止以糧米編餉者有兼人丁編餉者有每糧一石止抽七斗編餉者有將額糧隱匿多至二石以上者不惟事體紊亂苦樂不均而吏胥

侵費奸弊滋多今通行布政司揭查黃門將州縣下報除抄於甲申水冲沙壓奏免編餉一體除豁外其餘照數定編各店丁口俱免入及查見行市例審編戶官宦之家俱無優免此係各省通行事付吏司申咨

一均衙僻處驛傳設有水陸池有衝僻彼此調劑俱宜適均今本省頗有一處陸路而前後驛馬匹不一者有一處水路而前後驛通如隻不一者有路衝而船馬反少路僻而船馬反多者致使繁難者疲於奔命而冗濫者肆為侵欺弊已

久矣今酌衝僻之宜均彼此之額哀多益寡務使繁簡一致夫役不至偏累而錢糧免於虛糜矣

一革冗濫查得各驛遞原設馬紅站船數多冗濫以故節次議減該道又議於馬船減夫三名紅船減夫一名站船減夫二名將糧銀收貯在官以為船隻鋪陳之用而積習既久奉行不一納銀者既未支銷明白拖欠者亦不立限查追以致官無實用衆稱不便先該夔州府張知府咸本府八之山縣七隻人夫共四百五十名

名徵銀七兩二錢共徵銀三千二百四十兩買馬二百匹分給奉節巫山雲萬梁山五縣各四十匹走遞終是權宜處置亦非經久通行又查得嘉陵龍溪大洲峽口太平平灘等水驛永康唐安白渡安穩白鶴雅安百丈箐口武平永寧等馬驛俱路當偏僻而船馬冗濫俱酌量裁革以均勞佚

一定船隻查得四川紅馬站船原額數目不均而編派夫米互異致使勞佚懸殊奸弊百出貪猾得遂其私而官民莫究其故今通行查筭量為增

減使繁簡各適其均派歛必遵其則大要惟在
節民之力而為畫一之政開民之愚以杜侵耗
之端云耳今定馬紅站船人夫每名編米五十
石每石定銀一錢七分每夫工食每年定銀七
兩二錢馬船每隻人夫三十名共編米一千五
百石大造工價銀一百兩小修工價銀三十兩
每五年一大造三年一小修以十年計之大造
二次該銀二百兩小修二次該銀六十兩隨船
鋪陳亦五年一置價銀十五兩二次共銀三十
兩十年之中隨宜修理計銀一百兩以上共銀

三百九十兩筭得每夫米該銀八兩五錢除七
兩二錢作工食外仍餘銀一兩三錢總計夫三
十名每年該餘銀三十九兩十年該銀三百九
十兩作前項船隻鋪陳之費紅船每隻編夫十
三名共編米六百五十石大造工價銀五十兩
小修工價銀十兩每五年一大造三年一小修
以十年計之大造二次該銀一百兩小修二次
該銀二十兩隨船鋪陳亦五年一置價銀十兩
二次共銀二十兩十年之中隨宜修理銀二十
九兩以上共銀一百六十九兩每夫米該銀八

兩五錢除七兩二錢作工食外仍餘銀一兩三錢總計夫十三名該餘銀十六兩九錢十年共該銀一百六十九兩作前項船隻鋪陳之用站船每隻編夫十三名共編米六百五十石大造工價銀二十兩小修工價銀五兩每五年一大造三年一小修以十年計之大造二次該銀四十兩小修二次該銀十兩隨船鋪陳亦五年一置價銀五兩二次共銀十兩隨時修理銀三十兩以上共銀九十一兩每夫米該銀八兩五錢內將七名駕船每名除七兩二錢作工食外仍餘銀一兩三錢總計夫七名該餘銀九兩一錢十年共該銀九十一兩作船隻鋪陳之用給夫六名每名徵銀八兩五錢共計銀五十一兩作之應原糧下程之用

一查馬匹查得四川馬匹編食不一有一馬而編糧一千石以上者有五六百石者有三四百石者又有丁糧兼編者其寡懸絕大非事體查得江浙等省解送北直隸山東河南馬價每上馬一匹工價四十二兩中馬一匹工價三十兩下馬一匹工價三十五兩凡馬匹鞍轡草

料鋪陳馬夫工食支應皆在其中北路編審驛
傳俱照此則定糧事體歸一惟四川事體獨異
所宜釐正今議不分馬驢每頭匹止定夫一名
俱以糧石多者定為夫首少者湊數朋當每石
定銀一錢七分上馬每匹編糧二百五十石該
銀四十二兩五錢中馬每匹編糧二百二十五
石該銀三十八兩二錢五分下馬每匹編銀二
百石該銀三十四兩驢每頭編糧一百石該銀
十七兩其馬驢俱五年一買鞍轡鋪陳俱五年
一置如上馬價銀定一十二兩鞍轡銀四兩鋪
陳銀二十兩以五年計之每年該七兩二錢又
馬夫工食銀七兩二錢草料銀七兩二錢總計
每年該用銀二十一兩六錢中馬價銀定一十
兩鞍轡銀三兩鋪陳銀十五兩以五年計之每
年該銀五兩六錢又馬夫工食銀七兩二錢草
料銀七兩二錢每年該用銀二十兩下馬價銀
定八兩鞍轡銀二兩鋪陳銀十兩以五年計之
每年該銀四兩又馬夫工食銀七兩二錢草料
銀七兩二錢每年該用銀一十八兩四錢驢價
銀三兩鞍轡銀一兩鋪陳銀三兩以五年計之

每年該銀一兩四錢又驢夫工食銀七兩二錢
草料銀三兩每年該用銀十一兩六錢總計上
馬每匹每年餘銀二十兩九錢中馬每匹每年
餘銀一十八兩二錢五分下馬每匹每年餘銀
一十五兩六錢驢每頭每年餘銀五兩四錢作
支應之費

一議處協濟查得各州縣有原係簡僻而今為衝
要者原係衝要而不設驛站往來夫馬獨累友
持又或編貼各處夫役殊非平政恤民之道如
威州雙流縣俱經行要路未曾設驛又如梁山
大竹蓬溪射洪岳池一帶州縣抵潼川先年俱
無上司經過近年開通道路過往甚多而梁山
大竹上下交迤獨遠蓬溪三路相通更為繁累
又如奉節巫山雲陽三縣先俱由水路經行今
歸州一帶陸路開通夫馬遠涉水驛又難幫貼
以致應付煩難今俱斟酌衝繁等第議編協濟
夫役內有編往各處驛站者量與取回相兼里
甲夫馬走迤以紓民力

一議革館夫親當查得先年館夫多係隔遠編僉
應役不便故解銀在役後被官吏捏取徭戶

親當每名量其繁簡或折銀二十兩者或二十五兩者或五兩者或五十兩者官吏因而百計科索有一名而使用銀百餘兩者有甚至二百兩者節經兩院議革正身止令徵銀解驛雇役甚為民便各驛官吏因失見面常例又無日供下程及諸般科索捏申不便又令正身親當以致前弊日滋小民愈困前巡撫都御史潘 成案尚存不知者輕聽訥告遽為更改今於各水馬夫俱議有廩給口糧下程支應銀兩各該館夫不過看守門戶管理炊爨俱照原行徵銀解發官吏雇人應役支應油燭柴炭輕小之費不許仍要親身應當如果係極衝驛分准於原額每銀十兩加徵一二兩解發該驛仍明文簿支銷如有仍前捏申者就將官吏提究此節據所屬議申事理易見慎毋輕變重困吾民也

一均編夫役查得保寧府神宣通運所原額扛夫二百名先年議於重慶順慶劔州通江廣元昭化利州蒼溪等州縣均徭內審編共徵銀一千三十八兩三錢六分栢林通運所正德年間始設劔州蒼溪夫各四十名本夫親當巴州一百

名每名徵銀二兩馬十匹每匹徵銀五兩昭化
夫五十名每名徵銀一兩馬五匹每匹徵銀三
兩各解該所雇募近據驛傳道議報二所累稱
前項夫銀不敷支用乞要加編等因據此看得
前項夫銀於各該州縣均徭內審編不惟事體
不一抑致小民重困今議均編神宣遞運所夫
銀坐編劍州遂寧樂至射洪營山儀隴等縣共
編拉夫一百六十名每名編糧四十二石三斗
八升每年每石徵銀一錢七分共七兩二錢通
共徵銀一十一兩五十二兩七錢三分六釐

林遞運所坐編巴州金堂安岳二縣共編拉
夫一百五十七名每名編糧四十二石三斗
八升每年每石徵銀一錢七分共七兩二錢
通共徵銀一十一兩三十一兩四錢五分俱
自嘉靖二十六年正月初一日為始各徵解
保寧府收貯季初支發各該所雇募該府仍
給發印信循環文簿二扇要見某日支銀雇
夫若干送某衙門公使人負某人某人逐一
填註季終赴府查明倒換若有支剩銀兩年
終申報作正支銷其重順二府并劍州通江

等州縣原編前項二所夫銀既已審定務要
徵收完足解赴布政司作正支銷候至二十
八年以後不許審編仍禁不許假手吏胥通
同經收人役侵漁如違定行從重究治决不
輕恕

一添設遞運以便接送卷查先該前院題 准
將蒼溪縣八字堡巡檢司裁革改於槐樹驛
添設遞運所將該縣原編各項差役改編所
夫走遞又據布政司呈會議得保寧廣元委
應各設一遞運所該本院會同巡按四川監

察御史袁

議照閬中廣元水陸路道極係

衝繁况編戶鮮少差使殆無虛日地土瘠薄
應辦委難支吾飢饉頻仍逃亡相繼若不及
時拯濟將來困弊益深近該本院編發夫銀
雇募少舒民力但無專官經管未免日久弊
生雖救目前之急終非永久之規今據三司
各道重複勘議俱稱當設遞運已經題奉

欽依將保寧設為五路遞運所廣元設為寧蒼遞
運所訖看得二所與蒼溪遞運所扛夫原定
合州新都夫糧不足雖將其餘夫役仍令閬

中蒼溪廣元利州等衛縣出辦但各縣額糧
已編錦屏問津等驛船馬前項扛夫誠為偏
累既非經久之計亦礙畫一之規將來不免
告擾致有紛更俱應處補五路遞運所今定
編扛夫一百五十二名坐編合州糧四千六
百四十三石八斗七升一合永川縣糧一千
七百八十五石九斗五升五合一勺共糧六
千四百二十九石八斗二升六合一勺每石
歲徵銀一錢七分共銀一千九十三兩七分
四毫三絲七忽蒼溪遞運所今定編扛夫一

四十六名坐編新都縣糧四千四百三十
七石大足縣糧一千七百四十五石二斗七
升九合共糧六千一百八十二石二斗七升
九合每年每石徵銀一錢七分共銀一千五
十兩九錢八分七釐四毫三絲寧蒼遞運所
今定編扛夫一百四十六名坐編新都縣糧
三千六十三石墊江縣糧一千六百一十三
石六斗四升八合一勺廣安州糧一千五百
石共糧六千一百七十六石六斗四升八合
一勺每年每石徵銀一錢七分共銀一千五



十兩三分一毫三絲二忽五微以上銀兩通
年徵完俱限正月以裏解赴保寧府收庫分
作四季按季初給發各所雇募該府仍給發
印信循環文簿二扇要見某日支銀雇夫若
干送某衙門公使人負某人某人逐一填註
季終赴府查明倒換若有支剩銀兩年終申
報作正支銷毋致侵隱冒破以爲行從重
究問

一議處衝僻軍站該本院

站先年冬

編站軍走遞因往過頻繁未免偏累及查德

虎跳蒼溪三水驛經行甚少極為偏僻先議於
令協濟疲困陸路軍站亦未着實舉行案仰驛
傳道會同各分守道查得先奉前巡撫王批
據新都驛訴稱消乏批仰本道議於成都府庫
貯官銀每年每季幫貼夫馬銀十兩呈允遵照
訖又查得建寧秋林富村隆山栢林沙河驛似
為充實相應照舊其神宣龍潭施店槐樹古店
等驛委因差使浩繁各軍貧難逃亡數多應辦
不敷及查龍灘虎跳蒼溪三驛旗軍種石與各
六驛相等而力量實過之委又路在偏僻相應

議處均平合無將龍灘虎跳蒼溪三水驛於原額站船內量其各軍種石多寡每年每驛徵銀四十兩龍灘幫貼神宣虎跳幫貼施店蒼溪幫貼槐樹每年於孟月徑自解發各驛交割該管官吏雇募夫馬協濟走遞仍附記循環簿內本道年終查驗如不依期解發拖欠負累許該驛申呈本道究治古店龍潭二驛無從協濟相應比照新都驛事規古店馬驛於成都府龍潭馬驛於保寧府各庫貯官銀內各支四十兩俱自嘉靖二十六年為始二驛每年每季具領赴府各支銀十兩領回協濟依擬批行該道備行各該衙門一體遵照施行

立法稽查禁革積弊先該本院訪得各驛站官吏不恤民困任意索受日支下程嚇取見面銀兩其餘百計誅求難以枚舉節經出示通行禁革及將各船馬通行議處均一每年站船一隻除駕船夫七名外餘下六名共徵銀五十一兩每年上馬一匹餘銀二十兩九錢中馬一匹餘銀一十八兩二錢五分下馬一匹餘銀一十五兩六錢驢一頭餘銀五兩四錢俱作支應廩糧

下程之費并原編館夫銀兩相兼買辦計其所
用尚有餘剩此外別無科歛之端但恐支應無
法稽查不嚴各驛遞官吏不無仍踵前弊多方
求索致壞良規相應立法禁處行令各府州官
吏查照所管驛遞各置立空白文簿備云用印
鈐蓋每驛遞給發一本責令驛官收掌通將本
驛水馬夫并館夫銀兩會計總數或輪流支應
以銀數之多寡為日數之多寡或逐名支應如
趙甲支完方及錢乙錢乙支完方及孫丙凡遇
經過上司及公使人員合用廩糧下程等項一

切公費驛官出給花欄印信小票一張於內

註數目給與支戶買辦送用隨於簿內登記年
月日期支戶姓名物價數目候支戶輪支滿日
照票銷筭仍將印票付與支戶收照不許追取
如無印信票帖分毫不許聽信供送仍每季終
各將文簿送府州查考年終送院稽查其各該
支戶一年已畢或有支剩銀兩具數開報本府
州并驛傳道收候下年領支如或不敷明白申
請本院給發官銀補支毋得私自科派其驛官
驛吏一切取索之弊盡行革去敢有仍復踵習

者或被支戶告發或查訪得出就行拏問發遣
一給由帖先年船馬查理未周經制未備各色費
用俱無定額以致包攬光棍結羣聚黨肆行科
索或指一而為十或方去而隨來困斃之民誠
不堪命矣今人夫工食船馬什物費用備立定
規毫末不漏此外別無科歛之端各屬審編畢
口就將額定數目備開由帖給與夫首執照取
討如有分外需索者不許各戶聽從仍具實陳
告以憑拏問發遣充軍

禁革詐假關牌需索告示

一為禁革驛傳積弊以甦民困事訪得蜀中蠹弊甚
多而驛傳為最有詐假關文求索夫馬者有枉道經
行希圖折乾者有不遵事例濫給牌票者有驛站官
吏指以常例需索者有各驛遞棍徒用強包攬者以
致衙門日漸狼狽夫役愈加困苦深為民害合行開
款通行禁諭仰驛遞官吏夫牌支應人等各查照遵
奉施行

計開

一關文所以宣傳 天命應酬賓旅關係政體非
細故也近因冒濫題奉 欽依在內有勘合字

樣在外有赴撫按衙門掛號字樣方許應付禁
例甚嚴但無籍之徒玩而不遵有將遠年近日
底關或買盜印空紙或將假印印成假寫前赴
某撫按衙門掛號字樣或詐稱士夫子弟公使
人負有一人而持二關者有一關而書二名者
各該官吏不行查辯真偽一槩朦朧應付習以
為常仰驛遞等衙門官吏各一簿籍一扇凡遇
各處公使人負關文到日即查某官某舍某吏
某承有何照身批文某處公幹是實方許登簿
照依議定廩給口糧則例應付各於年終將號
簿申繳本院查考如無照身批及無公文之
者即便裁革不許應付仍將詐偽之人拏問
一驛遞支應皆小民脂膏訪得各衙門公差人負
多有不照原給關牌而分外需索夫馬下程及
勒索折乾者或將扇帕饋送而巧取者或有該
由正路而故由僻路該由水路而故由馬程以
圖多取者或赴縣討馬而又赴驛討舡折乾或
赴驛討舡而又赴縣討馬折乾者稍有不遂輒
便打毀門壁凌虐支應或梳其衣而笞其背或
揪其髮而傷其目憑城社之勢縱狼虎之貪驛

遞官吏無如之何甚至有司懦弱亦派取里甲
奉承小民怨咨旁觀切齒本院不得已置立號
票格眼通行三司各道收候凡各衙門一應差
遣人負俱令填給號票查驗應付仰驛遞官吏
夫牌或有司衙門如遇前項人負驗有齎執原
給格眼號票及出境關文到彼查無枉道經行
及違例需索就將應過馬匹舡隻廩糧人夫俱
填于後開格眼內用印鈐蓋其餘白頭關文牌
票俱不許應付亦不許分外饋送及夫馬折乾
若有阿縱容隱者一體治罪不恕

一查得各府掌印佐貳及守備提督指揮等官不
遵事例一槩濫起關牌騷擾驛遞已該本院行
令出示禁約外仰驛遞官吏遵照今後遇有越
所管部地方濫給牌票者即與查革不得一槩
應付違者查出通提治罪

一訪得各驛站官吏索受支應戶下程每日一小
支三日一大支米麵酒肉鷄鵝油燭茶果并紙
劄筆墨等項無所不備及遇當夫人役或庫子
館夫到彼索要見面銀多寡不等遇時節則有
節禮少有不遂尋事拷打又縱令家人用強求

索及積年慣徒通同勒騙不可枚舉今後通宜
禁革如有仍蹈前非者許被害之人指實近者
赴本院遠者赴守巡該道陳告拏問輕則革職
重則發遣

一訪得各處驛遞積年慣徒交通官吏經年包當
夫役每遇各州縣僉解夫頭入役輒便百計用
強逼迫各夫累苦不過只得雇覓乘機多勒工
食仍私去各戶原籍加倍追討寔為積蠹今
如有仍蹈前弊者許被害夫頭指實陳告
律例問發充軍

一查得見行條例內開一使客有職者俱支廩給
經過非公幹去處每驛支三升其跟隨內外官
員在外久住雖是有職例支口糧使客有役者
俱支口糧不拘便道經過止宿及本等公幹經
過止宿去處每驛俱支一升三合不許多支起
關米今訪得一應公差人員多不遵依分外多
索擾害官私合再申明禁約仰各衙門查照今
後除京職方面官員外其餘公差一應人員到
彼俱照後開則例應付不許違例需索及阿諛
奉承違者一體究治

查處里甲公費并走遞夫馬案

一爲定賦役以一政令以便遵守事該本院查得所屬州縣里甲公費俱照丁糧筭定月日時刻見年里甲挨次輪流自行買辦支應但訪得各該州縣不才官負每日取里甲下程一副掌印佐貳首領各分差等乾銷銀兩盡入私囊甚則將里分派屬各衙支使供應至於一切私用人情通行派及里甲又如新官蒞任所屬皆以水手下程名目折乾相迎祭祀鄉飲既編徃銀復派里甲幫補忍心害理肆行剝削本爲利派宿弊遂成應辦常規勞民傷財全無顧惜况若

樂不均如趙甲該分月日或值供應冗繁所費不貲如錢乙該分月日或值支應數少獨得寬減又因未有定則下民無憑遵守上司不得稽查行據各府州縣查報各項供應前來逐一酌量議定除應於贓罰銀內動支如新官到任家火上司衙門圍裙坐褥硃盒筆架并大小什物迎送上司傘轎又各該州縣如無驛站者隨時申請置造鋪陳上等鋪陳一副用銀一十一兩中鋪陳一副用銀四兩小鋪陳一副用銀一兩二錢各州撰進萬壽正旦千秋冬至四季表箋盤纏什物應朝造冊工食阜隸盤纏部糧解官盤纏

補修各衙門公廨孤老冬衣布花舊舉人會試給與
水手二名共銀二十四兩又除均徭內徵編如春秋
二祭鄉飲歲貢生貢盤纏應朝水手銀外其應該里
甲出辦者上司按臨并公差兩京方面官貢大下程
一分該用銀一兩五錢中下程一分該用銀七錢小
下程一分該用銀三錢每日支應上司公差人等牌
票關文如廩給一分折銀七分五釐口糧一分折銀
二分二釐五毫飯食折銀二分上司及公差官員中
火飯并下馬飯上司經過取用卷廂鎖索扛架棕籠
刑具并封筒卷殼封條梨木板印刷告示紙張及本

州縣新官到任陞任祭神猪羊三牲公宴掌印正
該用銀四兩佐貳官每貢三兩首領官二兩各官每
年案衣止許用絹并座褥硃盒筆架各一副正官用
銀三兩佐貳首領用銀二兩又絹涼雨傘各一把又
各官日用心紅油燭掌印正官每月該用銀九錢佐
貳官每貢每月六錢首領官每月三錢各官日用刑
具掌印正官每月該用銀一兩佐貳每月用銀五錢
首領官每月三錢歲考季考考卷茶餅給賞花
紅紙劄筆墨每月朔望本州縣官下學行香勸賞紙
劄三年大比賓興起送科舉生貢酒席盤纏歲貢生

員花紅羊酒新中舉人報捷紅綾掛旗并桅杆牌扁
紅紗羊酒出表上司按臨燈籠朔望行香及照堂油
燭吏房攢造年終紀錄催正民情官貧賢否憲綱戶
房四季贓罰循環錢糧倉庫年終勅諭錢帛戶口歲
桑歲支歲用禮房兩澤應付循環兵房夫馬循環
繳軍單快手刑房四季盜息民安審錄罪囚工房塘
堰城垣人匠等項文冊紙劄送審處決等項擡冊卷
冊扛架鎖索下操賞勸花紅每年春牛芒神木料工
食迎春酒席門神桃符元宵節燈議將衝繁附府縣
分每日定銀二兩每年該銀七百二十兩中等州縣

每日定銀一兩每年該銀三百六十兩簡僻州縣每
日定銀五錢每年該銀一百八十兩其中繁簡不等
者遞為增減約定規則每年里甲上役將見年丁糧
計筭總計丁若干糧若干每丁石該銀若干即查某
里人丁若干該銀若干糧若干該銀若干二項共銀
若干後開鄉圖坊里長某人本戶人丁若干該銀若
干糧若干該銀若干丁糧共銀若干甲首一戶某人
丁若干糧若干該銀若干各甲俱做此填註備造文
簿仍照簿給與各坊里圖由帖一張就用印對簿合
同鈐記簿內每里長名後空紙一葉掌印官收掌由

帖空紙半張各坊里圖收執應役之日各坊里圖支
應挨次順里不許紊亂一應大小供應凡舊規所有
及情理可通者俱要從實開寫掌印官出票買辦逐
日登記簿內鄉坊圖里甲登記由帖票內銀數用盡
就於簿帖尾書本坊里丁糧銀若干支用盡絕仍用
印合同鈐記由帖付里長收執止以原派丁糧銀米
數日支用盡絕不論日期如無前項簿帖里長不許
支應官吏就坐科斂贓罪黜革一年滿日如支應丁
糧銀數有餘即追收貯庫申報司道作正支銷如有
不敷扣算月日責令該年里甲攤辦年終備將計

過丁糧銀若干支用過各項銀若干有餘收庫或
是派補若干備開似冊申文申守巡道查考出巡所
至仍將前簿不時吊查其有原定則例開載不盡者
俱在里甲銀內支銷挨次填註上司不必過爲查詰
則法近人情而可以久行矣但雖掌印官留心綜理
從實填報不必自爲隱避毋指以迎新送舊及朝
覲考滿爲名科斂水手下程乾銷銀兩毋再以祭祀
鄉飲增添品物猪羊買辦不敷復派幫補毋致吏胥
里役行頭買辦指倚侵剋冒破違者從重究治又行
據合屬州縣各申報每年編派里甲夫馬事規緣由

到院查得各州縣有路當衝要而編派夫馬及少者
有路本偏僻而編派夫馬及多者有以見年里甲丁
糧編派者有以通州縣丁糧編派者有止令見年勾
攝糧差却將排年僉派夫馬應遞者有不論丁糧多
寡止照各鄉各甲分坐出備者有不將丁糧編僉止
令里甲各照丁糧分定日期隨時出備者有不將糧
編全以丁編者有以糧編馬丁編夫者及查雙流江
安納谿壁山等縣先年俱以見年里甲丁糧均編節
據該縣百姓告稱各甲丁糧多寡不同甚是偏累申
奉撫按衙門准允令其十年丁糧通融均編夫馬人
皆稱便刻石遵守外為照里甲十年九空專一備
走遞夫馬各省皆然如排年常川應役則百姓終無
休息妨廢農業莫此為甚至於排年之中則各甲丁
糧多寡不同見年之中則各鄉丁糧多寡不同若止
照甲分鄉不免苦樂懸絕况地方衝僻酌量俱未適
中而積弊相仍却稱隨時出備以致不才官吏人等
那移增減多派重科奸弊百端小民日困相應查照
雙流壁山等縣議處事規酌量均派查照今定事規
通將該州縣原額丁糧均作十分如一甲見役丁糧
數少將二甲丁糧撥補若一甲丁糧數多餘剩之數

留補二甲其餘甲分亦照前撥補如遇里甲接役照依各定夫馬數目編派掌印官就將該年均定丁糧親自註撥以丁糧多者為頭少者作幫通融均編應當其排年夫馬悉行裁革威茂汶保等州縣原係土民照舊應辦等因已經出給告示發仰各屬曉諭外今將酌定公費夫馬各數目擬合通行為此案仰本州縣官吏即將後開議定公費支應銀兩并走遞夫馬每年俱照前項規則編派永為遵守施行

查處合屬官負公費案

一為咨利弊以便興革事據成都保寧順慶等府各

本院案驗仰府嚴行釐革不許令庫禁等役買辦什物其應用心紅油燭紙劄刑具等項每月議定數目許將紙贖銀內支用等因依奉各將前項合用數目議報前來俱經批行依擬動支去後今經刊刻書冊查得各府所議油燭紙劄心紅刑具等項物件有無互異數目多寡不同又如各官案衣座褥止據保寧議報到任陞任宴席各府通未議定又或止議正官而不及佐貳或雖議佐貳而又遺首領既於事體未備終非經久可行及查成都附省事務繁多馬湖簡僻難與各府一例今定議各府公堂正衙每月

油燭茶果心紅紙劄筆墨麵糊廂鎖共該銀五兩成
都府該銀十兩馬湖府該銀三兩刑杖鐵鎖繩索共
該銀一兩五錢成都府該銀三兩馬湖府該銀六錢
案衣每年冬則用綾大小二副并座褥用銀四兩夏
則用紗大小二副并座褥用銀三兩共該銀七兩同
知通判推官每年每月油燭心紅紙劄筆墨共該銀
一兩五錢刑杖鐵鎖繩索共該銀四錢五分案衣每
年冬則熟絹夏則生絹各一副并座褥共該銀三兩
經歷知事照磨檢校司獄每貧油燭心紅紙劄筆墨
刑杖每月該銀六錢案衣坐褥每年一副用銀一兩
各府到任陞任宴席正官每次用銀五兩佐貳官每
次用銀四兩首領官每次用銀一兩五錢擬合通行
為此案仰本府官吏各將前項公用銀兩悉照今定
規則通行遵照仍各臨期申請將庫貯無礙紙贖銀
兩照數動支其以前里甲科派及庫禁出辦者通行
禁革本院止欲節省民力非敢浪費官銀如將前銀
入已仍復科取者豈惟法度不容抑亦神明共殛合
干上司如有察見此弊即以贓罪罷黜不必更論其
為人仰一體永為遵守施行

各道駐劄地方公費案

一為議定各道支應事照得布按一司守巡兵備各道出巡駐劄地方合用廩給柴炭油燭心紅紙劄及跟隨書吏廩糧各省俱有議定規則惟四川向無查議以致無所遵守查得見行條例一使客有職者俱支廩給經過非公幹去處每驛支三升本等公幹去處經過每驛亦支二升止宿則支五升一日經過兩驛以上俱許支給次日起程不許多支起關廩米其跟隨內外官員在外久住雖是有職例支口糧又一款使客有役者俱支口糧不拘便道經過止宿及本等公幹經過止宿去處每驛一例俱支一升五合經過兩三驛以上俱許支給不許多支起關米其跟隨巡撫巡按清軍刷卷巡鹽巡河盤糧勘事等項有役之人則支廩給今照前項事體相應會議畫一永為遵守擬合就行為此案仰按察司即便會同布政司掌印官逐一查議要見各道駐劄地方每月合用柴炭油燭心紅紙劄筆墨各應該若干廩給蔬菜茶果若干某道應用書吏幾名應用廩糧若干各於何衙門出辦動支何項錢糧逐一通行會議明白具由呈詳施行

查理邊務案

一爲查理邊務事照得本院欽承 勅諭撫茲全蜀
凡一應邊計夷情事宜俱應處置除通行欽遵外今
看得安綿威茂等處地方節報番蠻為寇日有警報
蓋因平時武備不修防禦無策以致諸番得逞乘間
竊發患之所始咎豈在他即今已調發兵糧肆行征
剿去後所有各邊備禦事宜相應通行查理為此案
仰松潘威茂安綿建昌敘瀘撫治等六兵備道即查
所轄地方原設守備等官各若干有無緊要中間應
否增置或應否減罷原立關堡各若干中間某處險
固應該仍舊某處失利應該遷徙或某處傾損應該
修築或某處空踈應該增置原額官軍村勇番兵民
快各若干某處冗濫應該減革某處寡少應該添撥
某項中用應該存留某項無用應該更換先年額設
者有無當因當革近議裁減者有無當遵當復及至
器械損壞者作何處置修補城垣坍塌者作何計議
修砌并其餘防備未盡事宜俱要悉心規畫詢謀僉
同務求萬全之策以樹不拔之防仍逐一親履其地
查議明白具由呈詳施行毋得避遠嫌疑虛文支吾
及拘泥成議漫無可否此本院與該道均有責焉革
相與究度以免疎曠俱毋違錯未便

祈雨案

一為祈禱雨澤事照得本院近由川東一帶抵省因天時亢旱雨澤久愆二麥既欠秀實夏禾尚難佈種百姓皇皇所在告急適當地方困弊豈可復罹凶災古稱休咎之徵各有攸致而天人之應誠如影響苟非政事有關何以陰陽乖和凡我有位能不軫念民艱以回天意合就通行祈禱為此案仰布政司即行本司并都按二司掌印佐貳等官并通行所屬州縣等衙門俱痛自修省以補積愆哀無告之榮民禁征求之貪吏革無名之妄費罷不急之工作清理獄囚毋致淹禁輕省罪罰毋事酷刑務在加意撫綏於消弭災沴仍禁止屠沽沐浴齋戒督率合屬官吏師生耆老人等恭詣城隍廟行香各寺觀僧道焚香誦經一體祈禱務期甘霖早降年穀順成人民樂業各該衙門俱備出給大字告示省諭仍各具行過日期得雨日時回報查考

祈晴案

一為祈晴事照得蜀中地方兵役不已輸輓既煩旱潦相仍災傷獨重正當秋月收成復值淫雨如注不惟新長菽豆俱被損傷而成熟禾稻槩為泥爛目擊

民艱不遑寧處此皆本院不能上宣 朝廷之德惠
下恤百姓之顛連貪吏在位而不能去政事失經而
不能正以致上千天和降茲顯罰內省愆違痛加修
省合就通行祈禱以格天心為此案仰布政司即便
轉行合屬官吏師生人等齋戒沐浴更衣擇期各赴
應祀壇所早暮行香虔誠祈禱務求頑陰頓開秋成
有賴以開百室以惠群黎仍禁止屠沽備云出示曉
諭一體祈禱具奉行日期申報

又祈晴案

一為祈晴事照得四川地方去歲兵荒相仍民不堪

命本院多方賑救不遑寧處但廩藏之儲蓄有限而
困弊之待哺無窮雖云少濟流亡未能盡免溝壑每
念及此殊為惻然即今二麥吐穗又遭天氣陰寒暴
風時作根苗枯瘁兼之瘟疫繁興死亡相繼雖因本
院撫循無狀亦係諸司政事多乖以致上千天和
殃及黎庶不惟目前當恤寔於將來可虞擬合通行
修省祈禱為此案仰布政司即便通行所屬痛自修
省黽勉職事罷無名之徵求止不急之勾擾禁貪猾
之病民緝盜賊之劫掠顛連力為寬恤餓莩即與掩
埋各率合屬官吏師生人等齋戒沐浴更衣擇期各

赴應祀壇所朝暮行香仍禁止屠沽竭誠祈禱責令各寺觀僧道致齋誦經務求頑陰頓開日色晴霽以回天意以慰群望毋得虛應故事有負子民之責具奉行日期呈來

賑恤事宜案

一為申明賑恤旱災事宜事案查節據成都保寧等府潼川嘉定等州各申稱所屬州縣俱被旱傷赤土不毛人民逃竄節經案行分府及本府州委官踏勘查審飢民聽候賑濟及一應事宜已經刻示曉諭并將軍前空運二運三運糧米通與罷免

節年拖欠錢糧姑與緩徵一切不急工作悉與蠲免況濫詞狀不許拘提富豪私債不許取討等因通禁諭及又委官放賑去後今訪得各該被災州縣貧民尚有坐填溝壑或流移四方或嘯聚為非顯是各該掌印佐貳官負奉行未至所有原行并賑恤未盡事宜合再申明為此案仰分守川西等道成都潼川等府州即便查照後開事宜務要一一着實舉行各將奉行過緣由呈來

計開

一便支領照得地方荒旱民不聊生張口待哺發

公家之積蓄以賑之不得已也然有司奉行不
至給散無方號令四出招集使來或離州縣三
四日或一二日及其至也多則守候一月半月
少則一旬半旬有親識者尚可趨食無親識者
必至乞丐望濟不得欲歸不能展轉淹延坐填
溝壑是名為賑之而實殺之也仰各該掌印并
各委官查照審報飢民先期出給告示定限前
來凡鰥寡孤獨老幼殘疾及委無家業面有菜
色者不論有無報冊公同里老戶首辨認真的
就將姓名年貌填給號票一紙審填既畢或
或銀就便唱名收票給散其離州縣百里之外
者亦先期聚集聽各該掌印委官親詣鄉村照
前審驗給散如有在城坐視不行下鄉或曉諭
不徧致有遺漏或耽延時日不即放賑者即係
忍心害民之官定以不才論黜其有遠近之間
銀穀異宜并未盡事情聽從民便其各州縣寄
頓糧米如軍餉要用則雇夫空運如番情寧息
則留作賑濟必不重困小民毋得虛言扇惑致
擾居民

一禁奸弊訪得往年賑濟公帑虛動於上實惠少

敷於下其弊不可勝言或官吏暗通庫斗抵換銀色剋減秤頭斛面者或不遵明定銀米規則而止給一半者或被積年詭名冒領者或戶首拴同里排兜領入已者或經收倉老斗級插和糠粃者或指稱差役邀截者或因欠私債逼奪者是使奸滑反遂侵漁而小民不救殘喘仰各該掌印并差委官負嚴行禁革但有前弊就便拏問枷號首告之人就將冒領銀穀給賞其贖穀則用印烙斗斛較量務要簸揚糠粃不許澆爛虛抵其贖銀當官責令銀匠鑿碎各主包封刊刻小記明開數目并分散官吏銀匠姓名但有低假虧欠執告究治

一勸借貸夫隣保相助在百姓當為義舉而號召倡率在官府宜以誠動嘗聞往年亦行勸借之令矣約束不嚴登時不免搶奪而號令不信日後又為負欠故貧者既貧而富者亦困殊非惠養之道也仰各有司延見富民委曲勸諭酌量各家積畜與家口食用或十而取其一二或十而取其三四就令當官寫立認狀如仍要還本者官為置立印簿給與執照候豐年照數追還

如樂然施與不望償還者即書尚義之門牌扁
懸掛仍用綵幣羊酒禮獎其家并給印帖免其
本身雜泛差徭量其所輸銀穀坐定附近飢民
各給官票赴彼關領定數之外并合不許多支
須嚴加禁約不許乘機攘亂毀打倉廩違者以
搶奪治罪仍將勸借過數目給散過飢口申報
禁豪強夫民之窮困固其平日奢與惰為之亦
因豪強之徒舉放錢債年以積年利以生利故
將子女田產牲畜布帛盡行威逼准折以致人
無常產且將稅糧拋去陪納今遇旱傷尤肆貪
噬人民安得不逃而為寇賊或至死亡也仰各
掌印官即便嚴禁凡有錢債俱不許取討待豐
年照數辦還如仍前故違逼取者許借主赴告
錢債斷與免追仍治豪強之罪目下窮迫小民
不難於棄業不許富民勒減價直騙買田土違
者產業給主價銀入官

一 緩征賦查得嘉靖二十五年分稅糧已奉 詔
書免四分今照被災州縣八分以上者未免之
數亦應 奏免但勘災體例俱各遞減未肯盡
除合行酌處仰各掌印管糧官即將本年應

徵六分稅糧不分邊糧祿米存留糧米及丁口均徭茶鹽課稅俱行停止或候奏請蠲免或待豐年帶徵其災輕州縣不及八分者不許一槩援例

一簡獄訟照得各該被災地方已該本院節將賑恤事宜禁諭及汎濫詞狀不許拘提近訪得所司間有故違明示以致不免拘擾除候查實另行拏究外仰各衙門於重災地方詞訟盡行停止各項未完前件非強盜人命不許差人下鄉拘提俟秋冬有收照舊聽理如違定行拏問

一收子女訪得旱災州縣林谷溪澗道路郊原往往有將一歲至十餘歲男女委棄不顧能行者起而乞食不能行者悲啼而死廢父母之常性傷天地之太和戾莫甚焉仰各有所司省諭得過之人或仕宦之家及經行商賈見有前項拋棄子女肯為收取撫養許令報官給與印帖執照或力能救五人以上者立扁尚義之門量加禮勸收為子女奴僕聽從其便若歲豐之日有來贖取者量其衣食費用加倍追償

一通商賈旱傷之地糧食必貴錢貨必輕是以商

賈乘時而集使商賈得利則舟楫必通而所之可致矣近訪得各州縣有閉糴者中途有為盜賊阻塞者至其地或仕宦之家人或黜革之吏承或奸猾之為經紀歇戶者或老人阜快之巡邏者把持凌虐科擾無端則商賈必畏而去矣商賈盡去則五穀不至民何所仰賴乎仰各有司即便嚴禁但有前項生事之徒許被害之人赴官具告問罪招詳

裁定合屬民快案

一為地方事節據潼嘉等州成華等縣申報原編民兵各數目到院案查先為前事已經通行查報去後今據前因為照民兵之設本以緝捕盜賊護守城池防禦非常近年以來官非其人或將徭編阜隸徵銀放遣拘令民兵跟用或差遣下鄉勾攝用為爪牙生事害人或坐衙分用寄托空名包納月錢或撥送勢要雜使且又容令輪日應當甲去乙來以致武備不振或又指以衣甲為名重科冒破以致侵擾百出查得巴縣額編民兵一千一百零六名瀘州一千五百名大足縣八百三十二名富順縣八百名江津縣七百五十四名名數冗濫不惟不用之禦寇而反用之

為寇竭生民之膏血而作地方之深殃莫此為甚已
該前院目擊時弊通行分班一年一換則上班者守
城下班者每名徵銀二兩以充官用法徒創始多未
遵行為照財力貴於撙節而事體要於僉同及查得
舊規工食每名七兩二錢但上役者以置辦衣甲為
名成邊者以盤纏犒賞為例有司藉以科歛而戶首
肆為侵漁多方剝削曾無已時亦應量處以便遵行
相應通融酌處以甦民困擬合通行為此案仰成華
等州縣官吏即將開去裁定民兵名數照依本州縣
丁糧盡數通融均編不許隱漏致生奸弊及編有餘
剩別為科收每名工食銀舊規七兩二錢之外應從
有司者加增置辦衣甲銀一兩輪成各邊者又增盤
纏犒賞銀一兩計筭本州縣每民兵二名通融該編
丁糧若干每糧一石該銀若干每人一丁該銀若干
俱以糧多者為頭糧少者為貼戶每名山給由帖一
張開寫出錢的數人戶姓名每年分為二季令其自
行執帖收討此外不許分毫多科及容令里書戶首
作弊侵刻編完就於各頭戶內揀選精壯一名置立
印信文簿登記年貌責令常川在官應役如本戶揀
無壯丁者許令顧募有底業精壯之人取其隣右保

芝園別集 公移卷之三
結准與替役亦照前登記年貌官給小圓牌一面備
開各甲及姓名年貌常川懸帶再不許私自更換及
輪流應當未為定規仍編為隊伍令掌印巡捕等官
時加操練務要武藝精熟事完各將編過丁糧數目
民兵姓名貼戶備細造冊繳報本院與各該兵備道
備照前項民兵止許遇警緝捕護守城池不許別項
差撥或掌印佐貳官似前占用及撥送勢要雜使亦
不許仍前別科置辦衣甲及輪戍盤纏犒賞之費如
違定行拏問不恕

芝園別集

公移卷之三終

芝園別集

公移卷之四

行各兵備道稽查邊鎮錢糧案

一為稽查邊鎮錢糧以釐積弊事照得各鎮倉庫收
支一應民屯本折糧銀贓罰商稅茶課局料等項銀
物因未立法稽查出納自由以致錢糧滋多或被監
收人負侵欺或被積年棍徒詭騙或抽匿卷簿漫無
稽考或洗改數目重支冒破如松潘衛經歷吳炳偏
重天平多收糧銀入已先年掌印指揮今陞龍州遊
擊張和同庫子趙茂枝何隆王珪侵分庫貯贓銀帶
管監收千戶李鸞同庫子劉廷甫陳典侵分屯糧銀



軍吏王元收侵犯人張萬昇等贓銀而趙茂枝王元欺隱文卷不行造冊以致無憑查考吳炳洗改案內人名總數劉廷甫陳典將王獻等口糧銀重造五起其爲巨盜可知近據松潘兵備道委官成都府推官任璜查出招詳到院看得發覺者十無一二而彌縫者十有八九且不獨松潘衛爲然而各邊鎮率多有之今日若復因循後弊將何紀極合就立法釐禁爲此案仰松茂安綿三道官吏照案事理即將該管倉庫收支一應民屯本折糧銀商稅局料茶課等項錢糧俱自嘉靖十六年爲始通吊歷年庫簿并收支人

卷逐一親自查理有罪人負究問招叅以後凡遇收受一應錢糧但有批解者俱赴該道掛號發各該衙門上納定限完銷及支放官吏旗軍土人番兵俸月口糧俸鈔馬料等項不拘多寡俱呈該道批允方許動支仍置立印信循環文簿發各收掌凡有收支逐一登載仍備開舊管新收開除實在數目逐月赴道倒換如有官吏交代該道親自盤驗明白付與收掌仍不時嚴加稽查以釐積弊每年終各將收支過錢糧順序月日備細造冊呈繳本院以憑稽考施行毋得違錯未便各具不違依准呈來

議處松茂安綿邊糧案

一爲議處邊糧事案查先該本院照得合屬原派起運松潘威茂二邊錢糧內松潘西寧等一十六倉每年額坐本折糧米八萬八千二十五石五斗由江油縣買米驗發上納威茂廣備等二十四倉每年額坐本折糧米九萬五千四百一十一石有零由灌縣買米驗發上納先年俱委府佐驗發事有專責邊儲得充近年因委用非人致有告訐當事者不察官之當擇遂併其法而廢之行委該縣掌印或佐貳官員驗發緣各官事係兼攝既無興利除害之志而品又凡

庸又少奉公守法之意頃使法禁槩至廢弛而奸弊日就叢生包攬任情侵欺無算完報者十無三四而逋欠者十有五六如灌縣店戶周準李達茂州攬頭張拱霄王章等積年截攬侵費官糧不下數千餘石坑累解戶久不完納雖問死罪充軍無產變納如此不已邊儲何由充實而小民何時息肩所據江灌二處雖查照舊規選委能幹府佐壹員在彼專駐凡放給銀兩驗發糧米查報歇戶編審脚頭拘提脫逃督併通關與一應釐革奸弊之事悉以委之年終更換責令造冊查理明白方行交代庶克有濟已行布政

司查委相應廉能府佐二員前去督驗每員定與跟隨吏書筆手共肆名日給口糧應用門阜俱令原任隨代自備工食外江灌二縣每處定撥民快二十名聽隨差遣合用廩給照例蔬菜每日定銀一錢柴炭油燭亦定銀一錢動支官銀應付又據同知高登備將原委驗糧事宜呈報本院逐一叅定內如選脚頭以承運今後驗糧官務僉抵業人戶作為脚頭通審戶隣里老必有瓦房三五間耕牛三五隻種子五六石衆口一詞方為僉點恐一名不足承當則選三人以攢一名以家業厚者為首家業薄者幫之一家侵盜兩家均陪其宣撫夷民四方雜處無有定拘者止令立為散脚亦不得定為脚頭以便約束但人戶消長不同逾年須用僉補者仍一體審有底業充之僉審既定造冊在官編立字號以次挨撥隨解戶糧石之多寡責令脚頭照數取同解戶給與脚價轉雇脚夫不許先後紊亂用計營求又如註脚夫之貫址蓋以脚頭既已精選殷厚人戶以為之主而脚夫則軍屯夷民五方雜處使無鄉貫住址則脚頭何以統率途次少有逃移不無又為均累合令支脚價之時令其備開花名項下某人係某處人見住某地名今投

歌戶某人同伴人某人喂養某騾一隻攬馱米一石
隨其糧之多寡照此以次備寫增減及驗糧發票各
照領銀花名項下亦備開寫付與解官管押萬一在
途有所踈失責令執牌稟告所在官司查其鄉貫住
址遠則移文近則徑自拘解該倉完納或因而作弊
轉賣先行責令補完仍解究申詳發落若所在官司
坐視不理以致邊儲有悞亦聽一體參究仍自一號
至十號百號至二三百號齎赴監收官收納間有一
號不到則在彼得以挨次查考非惟解戶得以安閑
管納而脚頭亦不至于偏累等因俱經通行遵守外

近又該本院因時值兵荒米價騰湧各邊倉糧難以
賈運即今送審剿平龍州安綿等處俱有支剩空運
糧米已行委官雇脚運各兵備道撥發各倉收貯准
作嘉靖二十五年各州縣歲辦本色及行所屬將起
運倉糧俱徵解布政司收貯聽候備邊支用以省盤
費民皆稱便議者謂此不獨宜于一時亦可垂於永
久及查川省稅糧惟邊倉爲累最甚蓋通年起運正
遇秋成米賤之時各州縣徵解價銀未至及徵解既
至時月已過又值米價騰貴難以糴買此其弊一也
又歌家乘機兜攬官解通同侵剋展轉撒秋遂至逋

負經年不完十有五六此其弊二也又解糧人戶多
係奸猾無藉之徒或赴司轉文或納獲通關輒復回
家科取盤纏飽其所欲方行完繳其間有花費侵欺
者追併無措則又槩累同戶鬻兒女以充數蕩產業
以代輸往往僉點解戶十室九空此其弊三也本院
灼知民艱已經逐一議處備行遵照第恐積習已久
遽難釐正未免仍蹈前轍深爲未便及查安綿兵備
道所轄六倉口原未設有驗糧官緣事體相同相應
一體議處擬合通行爲此案仰本司官吏照案事理
每年江灌二處選取所屬科第出身才堪幹濟府佐
官員呈請定委就彼駐劄專任責成如省城豐寧二
倉事例一年既畢又擇別府相應者定委到彼交代
方許離任不許濫委州縣佐貳及舉用非人致妨
國計跟隨人役并應支廩糧等項俱照原擬撥給應
用其安綿兵備道所轄倉分一體查委綿州能幹佐
貳官一員管理布政司每年將所屬原起運松潘西
寧三舍小河等倉本色米銀三萬五千一十兩二錢
二釐脚銀五萬七千五百九十八兩四錢五分八釐
廣備壘溪汶川太平等倉本色米銀三萬五千九百
五十六兩六錢三分一釐三毫六絲三忽五微脚銀

三萬七千四百一十一兩九錢四分九釐二忽壩底
等六倉本色米銀一萬三千三百七十三兩二錢三
分五釐九毫二絲俱自嘉靖二十六年為始定於七
月初旬預為呈請於庫貯銀內照數動支分投差官
解送江灌二縣驗糧官并綿州各交收聽各官召令
市戶或隣近州縣殷實人民務將乾圓潔淨火米或
四五十石或一二百石運赴彼處開報驗糧官如每
石時值銀五錢定與價銀六錢時值六錢定與七錢
時值七錢定與八錢每石收耗米五升驗糧官收受
入倉即行該州縣照數給價不許絲毫短少及抵換
低銀其扣剩糧銀各收貯庫以備米貴不敷支用買
米既畢驗糧官備將買過米石若干每石定價若下
扣除銀若干備細造冊申報本院及布政司并督糧
道知照其買完糧米驗糧官酌量倉口遠近查將隣
近州縣佐貳首領官呈請定委或一倉一官或二三
倉一官仍議將官銀量給與各官盤纏行取到彼眼
同雇脚陸續押赴原定倉口督同各倉攢盤量上納
仍呈各該兵備道查驗督察及將耗米五升內除二
升與脚戶以為脚耗餘三升隨糧貯倉該倉止將正
米出給印信實收二本送道掛號給付解官領回驗

糧官處投銷一本粘卷餘二本類繳布政司并督糧道收查各該脚頭脚夫俱照前案一體審覈應用原定脚價銀俱全數支給不許剋減該司仍嚴行各該州縣將起運邊倉糧銀作急徵解本司完足支過本色前銀照數扣貯司庫方將各該折色并歸化等倉下關脚銀類齊分別州縣倉口銀數差官徑解各兵備道發庫收貯出給印信實收付與解官回司銷繳既不許將本色銀兩解發遲滯致悞糴買亦不許將折色銀兩不候所屬通完起解致有拖欠待二三年之上如各邊積有贏餘或地方災傷米價騰湧暫行

停買候年豐之日照前買運江灌二縣如無空閑倉廩亦就估計工料動支官銀脩理每年仍照山東河南二省於小灘兌糧事例但臨買米之期督糧道專一住劄彼處往來督察若有扣減脚價隱匿不報或勢豪棍徒把持行市等項情弊應拏問者就便拏問應叅究者指實招叅以憑施行其各屬解到前項本折糧銀赴司投文即與收庫就便出給庫收一樣幾本令官解領回繳報合干上司不必再取兵備道批文及各邊倉通關實收各該官解不許仍舊支給官銀及科斂戶族盤纏如此則規矩既一而奸弊可以

坐釐事體又便而往返不致艱難邊儲之原額可充
得免空虛之患百姓之科斂頓省且無代陪之憂公
私俱便而經久可行矣該司仍行都按二司并守巡
督糧兵備等道及驗糧委官所屬府州縣各一體遵
照施行

查處類解貴州倉糧案

一爲查處起解錢糧以便輸納以從民便事據四川
布政司呈據重慶府申備江津縣申差驛丞陳仲良
管押解戶舒仲琴劉明才領解徵完二十五年分貴
州豐濟永寧二倉秋米銀二千九百九十九兩四錢

二分五釐轉解間隨據解戶舒仲琴等告稱前項糧
銀解赴貴州交納路由播州烏江等一十一站人煙
稀少即今彼處夷苗讎殺搶虜人財告乞分豁收貯
司庫類解該本司議擬前項路途梗塞難以解運乞
要收貯司庫類解相應俯從合無候呈詳允日將貴
州豐濟永寧二倉庫糧銀秤收貯庫候該省差官至
日本司差委軍職伴送該省上納取討庫收批回銷
繳呈詳到院批依擬附解外看得起運貴州糧銀中
間已完者常少而逋欠者恒多近該巡撫貴州都御
史王節次奏奉欽依於四川布政司庫貯銀內

借支五萬兩以抵拖欠該鎮之數外爲照四川相去
貴州路途險阻大戶往來不免剽掠之虞委官部解
又增需求之害兼以在家延住乘機通同侵欺或指
稱盤纏多科戶族財物公私俱爲不便逋欠因之積
多查得湖廣一省起運貴州糧銀俱徵解本司收貯
類總差官解運民稱極便所據前項糧銀相應比例
查處爲此案仰本司官吏照案事理即便通行各該
州縣將起運貴州一鎮錢糧俱自嘉靖二十五年爲
始并節年拖欠糧銀嚴限追徵完足解赴本司查照
湖廣事例照數秤收貯庫就便出給庫收完銷積至
二三萬或四五萬兩呈請本院差官類解該鎮交納
合用廩給馬匹并沿途護送兵夫起解應付其解戶
盤纏不許分毫科取庶錢糧易於完納而小民得免
科害仍行各該州縣查照永爲遵守施行俱毋違錯
未便抄案依准呈來

議處成都豐寧二倉錢糧案

一爲查處錢糧事據四川布政司呈奉本院案驗行
據委官監收夔州府同知劉楷呈據廣豐倉申稱查
得各州縣每年額坐本倉夏秋并祿米除改撥拔籍
糧米外實徵本折色米共一十七萬三千三百零三

石三斗九升三合二勺九抄四撮四圭內該本色米
八萬六千六百五十一石六斗九升六合六勺四抄
七撮二圭折色米八萬六千六百五十一石六斗九
升六合六勺四抄七撮二圭徵納本色糧米州縣成
都華陽溫江新繁德陽彭縣漢州崇寧等八處共米
一萬五千九百九十四石一斗五升三合內坐白米
一萬三百四十四石一斗五升三合早米五千六百
五十石本折兼徽州縣崇慶仁壽漢州彭縣金堂新
都內江新津嘉定峨眉洪雅犍爲榮縣威遠夾江儀
隴慶符等十七處共米三萬六千八百九十三石六
斗六升一勺六抄五撮二圭內坐白米四千三百八
十一石一斗二升三合五抄三撮八圭火米三萬二
千五百一十二石五斗三升七合八勺一抄一撮四
圭二項共該本色一萬八千四百四十六石八十三
升八抄二撮六圭折色米一萬八千四百四十六石
八十三升八抄二撮六圭不通舟楫險遠州縣徵銀
解司一半貯庫一半買米資縣岳池安岳遂寧銅梁
安居巴縣璧山江津榮昌南川墊江涪州邛州蒲江
大邑南溪瀘州等十九處共米一十二萬四百一十
五石五斗八升一勺二抄九撮二圭該本色米六萬

二百七石七斗九升六抄四撮六圭折色米六萬二
百七石七斗九升六抄四撮六圭大約每年放支成
都左右等七衛司官軍舊例每年坐放六箇月本倉
均放三箇月內除官軍折除外實支總計增減不等
外共米三萬四千二百八十二石九斗有零其支折
色月分俱赴司府官庫關支銀兩及查本倉見貯在
廩火白米共六萬三千四百四十三石九斗八升三
合七勺九抄六撮六圭約筭共該各王府祿俸并各
大小衙門官軍旗校孤老罪囚糧足穀一年零十箇
月支用又據廣寧倉申稱查得各州縣每年額坐本

倉除改撥外實該本折夏秋米一十萬七千七百二
十四石三斗八升四合七撮二圭八粒內該本色米
五萬四千八百一十三石六斗六升七合二勺三撮
六圭四粒折色五萬一十三石六斗六升七合二勺
三撮六圭四粒徵納本色糧米州縣眉州彭山青神
華陽崇慶漢州什邡彭邛新繁等十處共米一萬三
千二百六十一石內白米四千三百石火米八千九
百六十一石不通舟楫險遠徵銀一半貯庫一半買
米州縣雙流仁壽資陽南充西充廣簡合州永川大
足長壽宜賓富順丹稜一十四處共該本色米四萬

一千五百五十二石六斗六升七合二勺三撮六圭
四粒折色四萬一千五十二石六斗六升七合二勺
三撮六圭四粒大約每年支給成都左右等七衛司
官軍舊例每年放支六箇月本倉均支三箇月總計
支米三萬二千五百三十二石九斗其折色月分俱
赴司府官庫關支銀兩及查本倉見貯在廩糧米五
千六百四十石六斗九升約筭不穀官軍一月支用
各等因備申到職據此案照先奉四川布政司劄付
已經行查去後今據前因照得法隨時而變通其變
不病於民道待人而行果於行乃善於治即今本院

所示正經國之遠猷去病之良藥也但恐有司奉行
不至耳再照北直隸有府官督糧河南山東又加以
重臣部糧至京事完方許回任今日之糧不完者無
府官以督之也合無比照直隸等處行令各府管糧
官依期運糧至省候所屬州縣各獲通關仍令將舊
拖欠完過幾分方許掣取總批回任管事呈乞裁處
轉達施行等因呈報到司據此案照先奉本院案驗
前事仰司即查原坐豐寧二倉糧米若干內本色米
總計若干折銀兩總計若干大約每年支給官軍舊
例本色幾箇月總計該米若干折色幾箇月總計該

銀若干仍查隣近運米州縣的有幾處共有若干石該倉見貯糧米實有若干大約可穀幾年支用其不通舟楫與地方險遠徵銀解司轉發買米州縣實有幾處每年該買本色米若干應否將各官解解到原價每石七錢收貯司府庫內出給庫收筭掣通關銷繳如各衛官軍應折支民糧屯糧月分照舊支給外其應支本色月分秋成之時於內將兩箇月或照原價七錢量減一錢或量減二錢以作本色支用其扣餘銀兩貯作軍餉支用如慮倉廩空虛遇秋收豐熟之時布政司議呈動支前銀發成都府及成華二縣買

米數千石以充積貯仍於時價每石量增銀五分以便輸運如城市米戶有能預先將自己收積米石上納監收官查驗乾圓潔淨准與收倉取獲倉收方准赴官領價如此則公私皆爲便益而宿弊可以盡釐矣如曰以倉廩空虛爲言則如前所處固不患其空虛矣如曰以省城空虛爲言則前此市戶攬買亦附省米石未嘗遠有所輸運也第恐積年光棍不遂包攬侵欺之私或假支糧官軍或托地方里老捏詞呈告須就嚴加根究以杜弊端毋得墮其奸欺仰司逐一會同都布二司掌印官查議明白呈詳施行俱毋



違錯未便抄案依准呈來等因抄奉到司已經通行
查議去後今據前因卷查先奉巡撫都御史王 批
據本司分守川西帶管督糧左叅政李義壯咨准本
司咨奉本院批據委官監收豐寧二倉馬湖府同知
何克明呈稱要將二倉不通舟楫州縣本色糧米徵
銀解司收貯照詳奉批布政司再加查議詳盡必求
經久無弊乃爲可行此其大略也繳依奉備咨到道
查議到司具由呈詳奉批看得納米弊多納銀弊少
納米利少納銀利多蓋米之在倉者官軍一石掙和
沙土泥爛春簸淨得不過六七斗而已其脚價

侵盜等項半之若收銀在官每石七錢隨年豐歉照
依時價貴賤支放雖大凶之歲亦自可備蓋省城舟
楫可通商賈牟例而集故也倘遇大收官府與米鋪
行收糶量穀一二年餘皆折徵未爲不可大同邊鎮
不通舟楫本院曾一行之尚且軍民稱便所不便者
惟勢豪放債及奸商耳今如所議則誠有見於其弊
無見於其利也而累民害軍之弊亦未見也仰司再
加酌議呈奪依奉行准該道咨據成都府推官任璜
呈奉本道劄付看得豐寧二倉本色每米一石徵銀
七錢轉解仍令買米運納展轉貿易彼得入倉加以

蜀地卑濕蒸鬱之氣倉米易至朽敗及至支放之時
每米一石纔有五六斗可用值價不過三四錢今查
二倉原坐本色一十四萬內有舟楫所通人力所便
如成華等州縣原運本土米者共二萬七千有零其
餘俱是徵銀議將原運本色者照舊運米則三年之
間亦可積米七八萬石原解價銀者即收銀貯司按
月支放又查十四萬內原有屯糧二萬九百石亦係
原運本色但屢年不過一二百石其餘各衛遇米貴
即收銀貯衛若督令運倉則運本色者又通該五萬
餘石若除此則原數止一十二萬而已又該本司議

照任璜議將通舟楫去處如成都華陽金堂新津雙
流新繁彭縣眉州嘉定漢州新都彭山洪雅夾江犍
為等州縣原坐豐寧二倉糧米照舊運納本色其不
通舟楫重順二府邛簡威榮合巴壁山等州縣本色
糧米要行徵銀解司貯庫按月兼支間有願納本土
米者轉文運倉上納具由覆呈本院奉批仰依擬通
行遵照施行具由繳奉此已經通行遵照外今據同
知劉楷查議前來該本司左布政使嚴時泰會同按
察司按察使紀常都司署印按察司副使沈應龍議
將豐寧二倉糧米額坐各該州縣運納本折總數

目并支放成都等七衛司官軍月糧與夫豐收糴買等項遵照明案開立前件逐款查議登咨請乞鈞裁詳示等因呈詳到院據此案照先該本院查得成都豐寧二倉本折糧米本色每石定價七錢折色六錢除附近州縣本色俱自本處拽運外其餘不通舟楫與地方險遠去處本折俱各徵銀起解赴布政司轉文赴成都府驗納折色收貯府庫間月支給官軍本色驗發監收官處責令原部官解領出產米州縣收買火米赴倉交納中間多被解戶抽取原價轉寫與攬頭代納又被攬頭誑銀到手或撒秋營運或在倉接買軍士關出陳米交通官攢仍復上倉致使官軍不得實惠且又經年不行完納而官解因有抽取前弊彼此相挾不敢聲言及至官府查併緊急又累原解戶族揭借陪納傾家破業公私耗蠹莫此為甚節經禁約緣積弊已深卒難盡革及查前院據監收嘉定州同知賀世安及成都府通判包梧推官任璜各條議豐寧二倉奸弊緣由到院俱經批行布政司議處前來批行遵守但本源既未釐革節目尚欠周詳亦於宿弊未能遽止相應立法酌處已經備行該司查議去後今據前因查得合屬歲派廣豐倉本色米

八萬六千六百五十一石廣寧倉本色米五萬四千
八百一十三石六斗有零屯糧本色米二萬九百石
每年共本色米一十六萬二千三百六十石有零於
內支放本色米約計八萬一千九百三十餘石每年
扣該餘剩米八萬有零以十年計之該餘米八十萬
石今查廣豐倉見貯實在糧米止有六萬三千四百
四十三石九斗八升零廣寧倉見貯米止有五千六
百四十石六斗九升其前項扣餘之米明是經收人
負攬頭侵欺掛欠習以為常有收本色之名而無收
本色之實虧官損民弊源將何底極今據該司開立

前件議稱除成華溫江三縣全徵解本色金堂新津
雙流新繁彭漢新都崇慶嘉定夾江洪雅峨眉犍為
眉州彭山青神等一十六州縣俱舟楫所通人力所
便通年坐派本色俱運納實米相應照舊其內江資
簡等三十七州縣係地方險遠舟楫不通應將原坐
本倉夏秋本折俱徵糧銀解司貯庫聽候按月關領
支放又稱成都米價若遇豐稔之年每石值銀不過
六錢貴亦不過六錢四五分合無以後支放成都左
右等七衛司官軍該支實米月於本司庫貯所屬州
縣原解二倉本折糧銀七錢之數內各量減一錢支

給官軍自行買用所扣銀兩仍貯司庫作軍餉支用
又稱豐寧二倉見貯糧米共六萬九千八十三石有
零除成華等州縣本色米共三萬一千一百九十七
石八斗之外慮恐倉廩空虛合無行令今後每年秋
收監收官酌量二倉收貯糧米多寡若穀支各衛官
軍二三年之用不必糴買如少則約算計二三年該
用糧若干實在倉若干尚少若干具數呈來本司照
依時值扣算并增銀五分以作輸運之資議呈動支
司庫收貯三倉所屬原解本色糧銀數千兩發成都
府及成華二縣召令富戶領銀糴買運倉收貯仍

諭省城及隣近州縣市戶人等有能將自己糴買過
糧米預先運赴監收官驗果乾圓潔淨准與收倉掣
取倉收赴府縣官處一體給領及查得省城倉前無
籍光棍不務本等生理專一探聽各屬解到豐寧二
倉買米糧銀到省盛張酒席百計誘惑營求攬納騙
銀過手或以趙甲新糧完李丁舊糧或將今歲之糧
撒秋明歲方行上納甚至任意花費不行完官或偽
造假印虛出關單致累官解監併無辜家屬有累死
於獄者有賣子鬻女傾家蕩產者及至官府查係攬
頭情弊拘問監追所完十不及一往往父死監子子

死監孫終不能完是買糧一節深為未便若如會議則前奸莫售但恐此輩不遂所謀或假支官糧官軍或托地方里老人等巧捏浮詞阻撓前法誠有如本院所諭者合無備行成都府并監收官嚴行出示禁革等情相應依議擬合通行為此案仰布政司官吏照案事理即便通行所屬府州縣各照該司所議應運本色與應解折銀者各嚴限運解收貯各官軍月糧除民糧屯糧折支照舊外其應支本色六箇月如遇歲豐之年內支米二箇月折銀支給四箇月每石定給六錢如遇歲荒支本色四箇月折銀支給二箇月每石全給七錢倉廩所儲如足支三年不必發收買如有不敷即行成都府并監收官查議應買若干議呈該司將原收貯本色銀內動支給發成華二縣召令富戶收買每石增銀五分以為搬運之費庶民困少甦奸弊可革仍將合屬州縣原坐豐寧二倉糧米自嘉靖十五年以後拖欠各若干一一備細查明開報施行各屬錢糧自嘉靖二十五年為始府州縣俱責成管糧官催併完納掣取通關如過限不完照例住俸監併家屬其各府并直隸州管糧官俱限次年二月以裏照依各省部解事例離任赴省查理

各屬錢糧總掣通關依期完納者量行獎勵過期不完者仍行提問不許蹈襲故常因循廢格

議處京料解戶案

一為議處京料解戶事查得各省額辦派辦京料先年俱編有解戶近因各項銀兩俱委官類解議給水脚起關應付并沿途撥兵護送不用解戶幫解議行減革量於各州縣編僉一二人照名追銀解布政司收貯遇起解各色銀兩合用耗銀盤纏并箱架索扛就於京解銀內動支小民稱便今查得川中部解兩京本色生漆黃白蠟等項本色貨物與折色銀兩既

有解官類解給與盤纏銀兩每千兩仍復取解戶一名幫解其間道途往返之費解官科索之需京城打點之用各項糜費不可勝言領解人役因而除官封盤纏二十兩之外又另於本戶分派或三四十兩者有之甚至五六十兩者有之小民受害莫此為甚如近據壁山縣開報該縣額派京料銀四十九兩有零而以本縣丁糧編派殷實四十二名雖云每年坐取或一二名或三四名多寡不一然多編之數誠為虛濫小民差役愈加重困一縣如此則其餘槩可知矣相應議處以立成規案仰本司即查本省近年坐派

兩京各部物料銀兩折色若干查照各省事例止委
官類解議將 內府料銀每百兩加耗若干各部料
銀每百兩加耗若干此外仍給與盤纏起關應付仍
行沿途撥兵快護送不必更用解戶幫解自嘉靖二
十八年為始酌量州縣大小每年於均徭內定僉每
名盤纏銀照舊二十兩追銀解司如遇起解物料銀
兩解官加耗盤纏并箱架索扛就於此項銀內動支
仍查各州縣以前編定解戶各若干其未差撥者一
體徵銀解司收貯照今議施行奉此該本司議將兩
京各部折色每萬兩加添秤耗銀七十兩解官盤纏

照舊三十兩 內府折色每萬兩加添耗銀一百兩
解官盤纏三十兩各起關應付仍行沿途官司添撥
兵快護送及通行所屬將未差解戶八百七十六名
俱令每名徵銀二十兩解司以備差解京料折色解
官盤纏什物加秤等項支用再不許解戶幫解前項
解戶用盡又自二十八年為始查照議定後開州縣
每年於均徭審編每名照前徵銀二十兩刻定解司
收庫登記循環支用其偏僻繁難州縣姑免編派等
因呈詳本院批依擬通行所屬遵照俱於均徭內通
融審編不許仍前別提京解殷實款目每年銀兩刻

期徵解該司填報循環外仍置格眼文簿每季填報
查考又奉本院案驗據夾江縣申詳犯人龔大簡招
由查得先該布政司行縣取伊戶名龔正倫解戶一名
并追盤纏銀二十兩解司上納將硃漆給大簡等領
解差宋州判管押大簡回家說稱前銀封解赴京又
科派眾戶盤纏苗銀十兩索扛銀五兩又科苗銀二
十兩赴京回家又稱借過盤纏告追白銀二十五兩
俱入已問擬本犯徒罪除批行追贓發配外看得解
戶一名前後科派盤纏使費不下八十餘兩則其他
州縣弊害當不減此爲照起解本色黃白蠟硃漆等

料既差官管解有上納盤纏又有關文人夫則前項
解戶通屬無用不過虛應名色科害窮民合行一體
查革案仰本司即行所屬府州縣遵照其京料解戶
仍查照原行每名徵銀二十兩解司貯庫如遇起解
本色黃白蠟等料該司止許議差職官領解於本等
原定盤纏二十四兩之外就將前項解戶盤纏銀兩
盡數加給解官准作加耗使用如原議解蠟一萬斤
該解戶四名就將各差銀二十兩共八十兩通給解
官收領自行赴部掣取批迴仍起關應付人夫舟隻
并沿途撥兵護送不許仍取解戶幫解以啓科害之

端求為遵守施行如遇取解生漆等項亦照例差官管解其加耗盤纏臨期酌量呈請定奪

存留餘米折徵戶禮工三部料價案

一為議處急缺物料以便供應事卷查先該前院准戶部咨該本部題於戶科抄出甲字庫內官監右監丞張祿等題稱見今營建 宮殿等處興工及各衙門年例成造染造修理事物等項俱各缺少不敷供應等因題奉 聖旨戶部議處來說欽此欽遵抄出送司案查得正統十一年該本部官欽奉 英宗皇帝聖旨朝廷合用顏料百姓買辦艱難恁戶部便於

出產去處定數派去着該司府堂上官自正統十二年為始每年於存留糧內照彼處時值從公估計折徵務在兩平不許虧官損民折徵完備選委殷實糧戶管解戶部送該庫交納都着所司應付舡車脚力福建浙江廣東江西湖廣四川路經南京的着該部換與馬快舡隻運來敢有所司分派不均及通同無籍奸民作弊害人的都重罪不饒欽此通查案呈到部看得監丞張祿題稱物料缺少一節為照銀硃水膠槐花紫草黑鉛等料本部每年查照舊額斟酌坐派通行各司府州縣於存留糧內折徵解部交納乃

本部會派歲用之常即今營建 宮殿等處工程浩
大係工部備料處辦相應議處欲候 命下移咨工
部將前項大工合用物料各照原擬徑自處決等因
題奉 欽依并將各年拖欠料價開欵前來案行布
政司徵解聞又該前院查得戶部額派料銀原行於
存留糧內折徵今本省俱於均徭內編取重派一番
小民負累行據該司開報戶禮工三部額派及歲派
各色物料價數前來查得戶部額派該銀一萬一千
二百三十四兩有零禮工二部額派該銀二千四百
八十五兩歲派不常以二歲大約該銀八千七百有

零在此計筭除去戶部料銀今次均徭當減去一半
其戶部物料以後遇有坐派俱於存留糧內折徵案
行遵照於均徭內止徵一半隨據該司呈稱溫江雙
流邛新等八十四州縣約筭存留餘米三萬二千九
百三十八石五斗三升每石徵銀六錢該銀一萬九
千七百六十三兩一錢一分有零若使盡解戶禮工
三部料價亦足有剩本院明案止以戶部而言相應
行各州縣將存留糧銀准解戶部料價餘剩之數以
備各部歲派或邊儲之用其禮工二部料價照舊於
均徭內編派具由呈詳前院批行依擬去後今又陸

續據保寧順慶敘州等府黔江安居營山武隆崇寧
等縣各申報存留倉米積貯餘剩太多年久虫蛀腐
朽不堪等因該本院批行該司并行各該府縣准將
多餘米石變價其以後年分扣定該用數目多餘之
數照一把連每石徵銀六錢解司收貯支用外為照
前項料價原奉 旨意將存留糧內折徵況查保順
溫雙等府州縣存留餘米頗多折徵銀兩盡作戶禮
工三部料價尚有餘剩況前項料價節奉起解不常
而存留折徵之外又復編派均徭以致數目混淆追
解不清官府視為等閑奸滑罔為已有近查十年之

間而拖欠二十二萬有餘則濫派侵欺之弊可坐見
矣况四川地方羌苗交錯各邊輪戍與不時征剿百
姓困苦兵餉獨陪他省若通將各州縣均徭減革似
足少紓民力且近該戶部題奉 欽依查將存留糧
米徵銀備邊相應查議為此案仰本司官吏照案事
理即查戶禮工三部料銀額派加派每年實計該銀
各若干存留餘米徵銀通作三部料銀之數有無足
敷此外或有餘剩若干堪以部解備邊支用其均徭
料銀應否盡行革免有無穩便務要從長計議停當
以圖經久可行仍開列各府州縣糧米銀數備細

由作速呈詳以憑定奪施行俱毋違錯未便

芝園別集

公移卷之四終

